

元祐黨人傳

元祐黨人傳十卷余友陸存齋觀歿撰黨  
碑凡三百九人宋史有傳者不及百人或  
附見而不盡詳且舛謬焉又或漏不立傳  
皆遍搜羣籍參伍考證必允必備可為勲  
矣存齋甫四十即賦歸去來閉門著書十  
餘年先後付梓不下數十種充其量甯止  
等身已邪方察京用事時以一黨字錮業

司馬諸賢其計甚巧夫人主深居九重與  
外廷隔絕惟恐天下欺己羣天下之人而  
有黨豈非所大恨然而黨矣負於國家而  
人主仇視焉何哉夫天生君子亦生小人  
小人趨利而避害其利也陰陽百試必羅  
致於一月而不令人之攘之其害也雖察  
攸之於其父有相軋而無相袒君子不然

明知天下之大斷難一手一足為之治廣  
引才德之士聯聲氣共功名以通上下之  
情以平遠近之是非設遇矣手之勢不可  
以嘗試而至公至正之氣不肖稍有所遷  
就疾起而與之角而人主之心益疑夫從  
古豈有端、涼、之君子哉不是之惡而小  
人之言是聽是故宗祚之衰非衰於金人

之釁而衰於崇甯之黨禁不待杜鵑鳴於  
洛陽識者已卜其不永矣厥後蔡京以於  
潭州骨肉俱腐而黨碑光耀於無已果孰  
得而孰失邪然則存齋此書不第闡諸賢  
之幽抑亦宗以後之千秋金鑑也光緒己  
丑冬十月楊峴拜序

元祐黨人傳凡例

一黨碑三百九人內宋史有專傳者凡七十八人  
附傳者三十四人節略史傳以省繁複

一宋史雖已附見而事蹟不詳者如趙彥若王汾  
吳安詩劉唐老范柔中韓治范正平蘇昞之類  
皆徧攷羣書補輯事迹

一如姚勔岑象求楊康國朱紱鄧忠臣秦希甫周  
絳楊瓌寶馬渭陳鄂蘇嘉尹材商倚李深李新  
陳并周鏐黃隱呂希績皆卓然可傳而宋史不  
爲之立傳今爲攷補不厭求詳

一宋史王鞏傳僅載其從東坡游魁山事殊非史體今採輯羣籍爲之補傳

一鄭俠陳瓘史傳雖詳頗有舛誤今加參考別爲之傳

一高遵裕卒于紹聖中與高遵恪決非一人种師道列元祐黨籍見宋史本傳碑有師極無師道當爲師極改名並加審正

一趙令時史附燕懿王傳王古史附王素傳金石萃編以爲無傳誤也今並增補事蹟

一黨禁始末別爲一卷列于簡末

元祐黨人傳目錄

卷一

文臣曾任宰臣執政官

卷二

曾任待制以上官

卷三

曾任待制以上官

卷四

餘官

卷五

餘官

卷六

餘官

卷七

餘官

卷八

餘官

卷九

武臣 內臣 爲臣不忠曾任宰臣

卷十

黨禁始末

元祐黨人傳卷第一

誥授榮祿大夫三品頂戴前廣東南韶連兵備道調補高  
廉道權福建鹽運使司鹽法道加四級臣陸心源纂  
文臣曾任宰臣執政官

司馬光傳

司馬光字君實陝州夏縣人生七歲如成人羣兒戲  
于庭一兒登甕沒水中光持石破甕兒得活京洛閒  
畫傳其事實元初登進士甲科年甫冠性不喜華靡  
聞喜宴獨不戴花同列曰君賜也乃簪其一歷官直  
秘閣同知諫院英宗立進龍圖閣直學士神宗立權翰

林學士光嘗患歷代史繁人主不能遍覽爲通志八卷以獻英宗命置局續其書至是帝名之曰資治通鑑自製序授之王安石得政行新法光逆疏其利害拜樞密副使光辭抗章至七八請判西京御史臺歸洛凡居洛十五年天下以爲眞宰相田夫野老皆號爲司馬相公婦人孺子亦知爲君實也哲宗立爲門下侍郎罷保甲諸法拜尚書左僕射罷青苗復常平法元祐元年九月薨年六十六贈太師溫國公諡文正賜碑曰清忠粹德紹聖初御史周秩首論光誣謗先帝章惇蔡京請發冢斲棺帝不許乃令奪贈諡元

符末復太子太保崇甯元年降右正議大夫京撰姦黨碑令郡國皆刻石長安石工安民當鐫字辭曰民愚人固不知立碑之意但如司馬相公者海內稱其正直今謂之姦邪民不忍刻也府官怒欲加罪泣曰被役不敢辭乞免鐫安民二字於石末恐得罪後世聞者愧之靖康元年還贈謚建炎中配享哲宗廟庭事蹟詳宋史本傳

參楊仲良長編紀事本末

文彥博傳

文彥博字寬夫汾州介休人其先本敬氏以避晉高祖及宋翼祖諱改焉及進士第歷殿中侍御史樞密

副使參知政事貝州王則反明鎬討之久不克彥博請行旬日賊潰檻送則京師拜同中書門下平章事御史唐介劾其在蜀日以奇錦詣官掖介既貶彥博亦罷知許州至和二年以吏部尚書同平章事明年正月帝方受朝疾暴作扶入禁中彥博呼內侍史志聰問狀對曰密禁不可漏言彥博叱之曰爾曹出入禁闥不令宰相知天子起居欲何爲耶自今疾勢增損必以告不爾當行軍法又留宿殿廡衆心以安久之以同平章事判河南英宗卽位入爲樞密使熙甯中以論市易爲王安石所惡拜司空判河陽元豐

二年拜太尉請老以太師致仕居洛陽元祐初司馬  
光荐彥博宿德元老宜起以自輔宣仁后命平章軍  
國重事居五年復致仕紹聖初章惇秉政言者論彥  
博朋附司馬光詆毀先烈降太子少保卒年九十二  
元符末復太師崇甯元年降太保預元祐黨籍後特  
命出籍追復太師諡曰忠烈事蹟詳宋史本傳

長編紀  
事本末

參楊  
仲良

### 呂公著傳

呂公著字晦叔以父夷簡恩補奉禮郎登進士第熙甯  
初知開封府明年爲御史中丞王安石方行青苗法

公著極言自古有爲之君未有失人心而能圖治亦  
未有脅之以威勝之以辨而能得人心者也安石滋  
怒誣以罪出知潁州元豐元年爲端明殿學士哲宗  
立陳君道十事拜尙書左丞門下侍郎元祐元年尙  
書左僕射與司馬光同心輔政光卒公著獨當國禁  
主司不得以老莊命題舉子不得以申韓爲學經義  
參用古今儒說毋得專取王氏三年拜司空同平章  
軍國事明年二月薨贈太師中國公諡曰正獻御書  
碑首曰純誠厚德紹聖元年章惇爲相以翟思張商  
英周秩居言路論公著更熙豐法度削贈諡再貶建

武軍節度副使昌化軍司戶參軍徽宗立追復太子  
太保蔡京擅政復降左光祿大夫入黨籍尋復銀青  
光祿大夫紹興初悉還贈諡事蹟詳宋史本傳

呂大防傳

呂大防字微仲其先汲郡人祖父葬藍田遂家焉進  
士及第調馮翊簿永壽令縣無井遠汲于澗大防用  
考工水地置泉之法疏爲渠民賴之號呂公泉英宗  
立自太常博士爲監察御史裏行疏言綱紀賞罰未  
厭四方之望者五年京師大水陳八事神宗立厯知  
制誥元豐初神宗以彗星求言大防陳三說九宜哲

宗立爲翰林學士元祐元年拜尙書右丞超尙書左僕射兼門下侍郎大防不植朋黨與范純仁同心戮力進退百官不可干以私凡八年始終如一懇乞避位未幾左正言上官均論其隳壞役法右正言張商英御史周秩劉拯相繼攻之奪學士知隨州貶秘書監分司南京居郢州言者又以修神宗實錄直書其事爲誣詆徙安州紹聖四年貶舒州團練副使循州安置至虔州病薨年七十一徽宗卽位復其官崇甯元年詔宣仁寢疾彌留永泰陵年已及冠而大防委政閹寺莫肯以復辟爲言降太中大夫高宗紹興初

又復大學士贈太師宣國公諡曰正愍事蹟詳宋史

本傳

參楊仲良紀  
事本末

劉摯傳

劉摯字莘老永靜東光人嘉祐中擢甲科歷冀州南  
宮令與信都令李冲清河令黃莘皆以治行聞人稱  
河朔三令擢檢正中書禮房默默無所好也才月餘  
爲監察御史裏行欣然就職及入見神宗問卿從學  
王安石耶安石極稱卿器識對曰臣東北人少孤獨  
學不識安石也既論率錢助役十害執憲數月百僚  
敬憚時人以比包拯呂誨元祐元年擢御史中丞連

進尚書左丞中書侍郎六年拜尚書右僕射爲朋讒  
奇中以觀文殿大學士罷知鄆州紹聖初來之邵周  
秩論禁變法棄地罪奪職知黃州再貶光祿卿分司  
南京蘄州居住四年陷邢恕之謗貶鼎州團練副使  
新州安置至數月以疾卒復遭謗免其子官與家屬  
徙英州凡三年死于瘴者十人徽宗立詔反其家屬  
復摯大中大夫崇甯元年降朝議大夫後又復觀文  
殿大學士大中大夫紹興初贈少師謚曰忠肅事蹟  
詳宋史本傳

楊仲良紀  
事本末

范純仁傳

范純仁字堯夫蘇州吳縣人以父仲淹任爲太常寺  
太祝中元祐元年進士時胡瑗孫復石介李覲皆在  
仲淹門純仁從之游講肄至夜分不寢置燈帳中帳  
頂如墨以箸作佐郎知襄城縣論民植桑有罪情輕  
者視所植多寡除其罰民號箸作林哲宗立除給事  
中元祐初進吏部尙書三年拜右僕射章惇相純仁  
堅請去遂知穎昌府又徙陳州呂大防等竄嶺表純  
仁疏申理忤惇意落職知隨州明年又貶武安軍節  
度副使永州安置徽宗卽位卽日授光祿卿分司南  
京鄧州居住道除右正議大夫提舉崇福宮不數月

以觀文殿大學士充中太一宮使純仁乞歸許養疾  
建中靖國改元元旦受家人賀明日熟寐而卒年七  
十五詔贈開府儀同三司諡曰忠宣御書碑額曰世  
濟忠直之碑崇甯元年奪諡告二年毀碑事蹟詳宋

史本傳

參楊仲良  
紀事本末

韓忠彥傳

韓忠彥字師朴琦子以父任爲將作監簿後舉進士  
元祐中爲戶部尚書遷知樞密院事哲宗蒞政更用  
大臣以觀文殿學士知真定府移定州忠彥在西府  
以用兵南方非是願以所取之地棄還之以息民力

至是言者以爲言紹聖四年詔忠彥助誣民之浮說  
行蹙國之匪謀降資政殿學士改知大名府徽宗卽  
位以吏部尚書召拜門下侍郎踰月拜尚書右僕射  
兼中書侍郎進左僕射兼門下侍郎封儀國公而曾  
布爲右相多不協言事者助布排忠彥以觀文殿大  
學士知大名府又以欽聖欲復廢后爲忠彥罪再降  
大中大夫懷州居住又論忠彥在相位不應棄滄州  
謫崇信節度副使濟州居住逮復滄州謫磁州團練  
副使復大中大夫遂以宣奉大夫致仕卒事蹟詳宋

史本傳

參楊仲良  
紀事本末

曾布傳

曾布字子宣南豐人學于兄鞏同登第歷開封令以  
韓維王安石荐上書大率皆安石指也神宗召見論  
合意授檢正中書五房凡三日五授勅告與呂惠卿  
共創清油助役保甲農田之法紹聖初拜同知樞密  
院進知院事章惇爲相布贊惇紹述甚力請甄賞元  
肺臣庶論更役法不便者以勸敢言惇遂興大獄陷  
正人流貶鑿廢略無虛日布多陰擠之徽宗立拜右  
僕射崇甯改元罷爲觀文殿大學士知潤州坐贓賄  
落職提舉太清宮太平州居住又降司農卿分司南

京又責散官衡州安置又以棄湟州責賀州別駕大觀元年卒于潤州後贈觀文殿大學士諡曰文肅事蹟詳宋史本傳

參楊仲良紀事本末

### 梁燾傳

梁燾字況之鄆州須城人舉進士中第歷集賢校理元豐時上書曰青苗之錢未償而責以免役免役之錢未入而重以淤田淤田方下而復有方田方田未息而迫以保甲其爲害之實雖有言者而上下相蒙竟成就其事臣謂天下之患不患禍亂之不可去患朋黨蒙蔽之俗成使上不得聞所當問故政日以敝

而禍亂卒至也元祐七年拜尚書右丞蔡京帥蜀燾  
言京輕險貪愎不可用以疾罷爲資政殿學士同禮  
泉觀使紹聖元年知鄆州朋黨論起以司馬光黨黜  
知鄂州三年再貶少府監分司南京明年三貶雷州  
別駕化州安置卒元符末復右中散大夫崇甯元年  
降復朝請大夫事蹟詳宋史本傳

楊仲良紀  
事本末

### 王巖叟傳

王巖叟字彥霖大名清平人神宗初置明經科巖叟  
年十八鄉舉省試廷對皆第一改知定州安喜縣有  
法吏罷居鄉里道人爲訟巖叟捕撻千百衆皆竦然

哲宗卽位劉摯荐爲監察御史明日卽上書論社稷安危之計在從諫用賢不可以小利失民心元祐六年拜樞密直學士簽書院事宰相劉摯爲御史鄭雍所擊嚴叟連上疏論救摯去位御史遂指爲黨罷爲端明殿學士知鄭州明年徙河陽數月卒贈左正議大夫紹聖初追貶雷州別駕元符末復朝奉郎崇甯元年降復定遠軍行軍司馬事蹟詳宋史本傳

楊仲良紀事本末

### 蘇轍傳

蘇轍字子由與兄軾同登進士又同策制舉元祐六

年拜尚書右丞進門下侍郎紹聖初上疏哲宗起李清臣爲中書舍人鄧潤甫爲尚書左丞二人久在外不得志稍改言熙豐事以激怒哲宗意會廷試進士清臣撰策題卽爲邪說轍諫哲宗覽奏以爲引漢武方先朝不悅落職知汝州三年又責化州別駕雷州安置徽宗卽位徙永州岳州已而復大中大夫提舉鳳翔上清太平宮崇甯中蔡京當國又降朝請大夫罷祠居許州復大中大夫致仕築室于許自號潁濱遺老政和二年卒追復端明殿學士濬熙中謚文定事蹟詳宋史本傳

王存傳

王存字正仲潤州丹陽人年十二辭親從師江西五年始歸登進士第歷知太常禮院存故與王安石厚安石執政論事多不合累上書陳時政因及大臣無所附麗元豐初擢正言五年遷兵部尚書元祐初累遷尚書左丞資政殿學士吏部尚書時在廷朋黨之論寢熾存爲哲宗言人臣朋黨誠不可長然或不察則濫及善人由是復與任事者戾除知大名府改知杭州紹聖初請老提舉崇禛觀遷右正議大夫致仕既而議者指存嘗議還西夏侵地降通議大夫建中

靖國元年卒贈左銀青光祿大夫崇甯元年追所贈

官名列黨籍事蹟詳宋史本傳

參楊仲良  
紀事本末

鄭雍傳

鄭雍字公肅襄邑人哲宗立拜尙書左丞紹聖初治元祐衆臣雍頓首自列周秩乘隙詆之謂雍初爲侍從因徐王私於權臣以進哲宗怒黜秩二年以資政殿學士知陳州徙北京留守坐元祐黨奪職知鄭州改成都府元符元年提舉崇福宮歸未至而卒徽宗立復資政殿學士太中大夫崇甯元年追所贈官列名黨碑事蹟詳宋史本傳

參楊仲良  
紀事本末

傅堯俞傳

傅堯俞字欽之本鄆州須城人徙孟州濟源十歲能爲文未冠登第嘉祐中爲監察御史仁宗春秋高堯俞請建儲以慰天下望英宗卽位轉殿中侍御史以諫濮議出知和州熙寧三年至京王安石素與之善方行新法謂之曰舉朝紛紛俟君來久矣將以待制諫院處君堯俞曰新法世以爲不便誠如是當極論之平生未嘗好欺敢以爲告安石愠之但授直昭文館權鹽鐵副使元祐四年拜中書侍郎六年卒年六十八贈銀青光祿大夫諡曰獻簡紹聖中以元祐黨

人奪贈諡著名黨籍後黨錮解下詔褒贈錄其子事蹟詳宋史本傳

趙瞻傳

趙瞻字大觀其先亳州永城人徙鳳翔之藍屋舉進士第知夏縣作八監堂書古今賢令長治迹以自監又以秘書丞知永昌縣築六堰灌田歲省科歛數十萬水訟咸息民以比召杜元祐三年擢樞密直學士簽書樞密院事明年以中大夫同知院事五年卒贈銀青光祿大夫諡曰懿簡紹聖中言者以傳會元祐諸臣追奪所贈官列于黨籍事蹟詳宋史本傳

韓維傳

韓維字持國億第五子其先真定靈壽人徙開封之  
雍丘以進士奏名禮部方億輔政不肯試大廷受蔭  
入官父沒後閉門不仕歐陽修荐爲檢討知太常禮  
院溫成后立廟用樂維以爲不如禮請一切裁去議  
陳執中謚以爲張貴妃治喪皇儀殿追冊位號皆執  
中所建宜謚曰榮靈神宗卽位除龍圖閣直學士熙  
甯三年遷翰林學士明年爲御史中丞七年爲學士  
承旨元祐更役法命維詳定拜門下侍郎處東省踰  
年有忌之者密爲讒懇以太子少傅致仕轉少師紹

聖中坐元祐黨降左朝議大夫再謫崇信軍節度副使均州安置元符元年復左朝議大夫是歲卒徽宗初追復舊官崇甯元年列名黨碑事蹟詳宋史本傳

孫固傳

孫固字和父鄴州管城人登進士歷少府監神宗問王安石可相否固曰安石文行甚高狷狹少容必求賢相呂公著司馬光韓維其人也凡四問皆以此對安石當國更法度固議事數不合又極陳青苗匪便元祐二年知樞密院事累官右光祿大夫五年卒贈開府儀同三司諡曰溫靖紹聖時奪遺澤元符二年

奪所贈官列元祐黨籍政和中徽宗以固嘗爲神宗  
官僚特出籍悉還所奪事蹟詳宋史本傳

范百祿傳

范百祿字子功成都華陽人鎮兄錯之子也第進士  
又舉才識兼茂科元祐初爲吏部侍郎拜中書侍郎  
右僕射蘇頌坐稽留除書免百祿以同省罷爲資政  
殿學士知河中徙河陽河南薨贈銀青光祿大夫崇  
甯元年列名黨碑事蹟詳宋史本傳

參楊仲良  
紀事本末

胡宗愈傳

胡宗愈字完夫常州晉陵人元祐初進起居郎中書

舍人給事中御史中丞哲宗嘗問朋黨之弊對曰君子指小人爲姦則小人指君子爲黨明日具君子無黨論以進拜尙書右丞諫議大夫王觀論其不當而劉安世韓川孫覺等合攻之罷爲資政殿學士知陳州徙成都府召爲禮部尙書遷吏部紹聖元年罷爲通議大夫知定州卒崇甯元年列名黨碑事蹟詳宋

史本傳

參楊仲良紀事本末

李清臣傳

李清臣字邦直魏人自幼敏悟能文章韓琦以兄子妻之第進士爲和川令應材識兼茂科歐陽修以比

蘇軾試秘閣韓維以比荀卿擢秘書郎簽書平江軍判官名聲藉甚英宗曰韓琦太避嫌李清臣者顧可抑之乎以歐陽修荐得集賢校理作韓琦神道碑神宗讀之曰良史材也擢至知制誥元豐六年拜尙書右丞哲宗卽位拜中書侍郎紹聖元年廷試進士清臣發策皆紕元祐之政於是紹述之論大興國是遂變章惇入相逐諸臣并籍文彥博呂公著以下二十人將悉竄嶺表清臣曰更先帝法度不爲無過然皆累朝元老若從惇言必大駭物聽帝曰是豈無中道耶令揭榜朝堂置餘人不問有狂婦人告清臣謀反

屬吏補治本澶州娼而清臣姑子田氏外婦者清臣用御史言不引去以大學士知河南元符三年七月坐章惇叩閣不上聞落職知真定府徽宗立入爲門下侍郎尋爲留布所陷出知大名府而卒贈金紫光祿大夫崇甯元年奪職追所贈官列名黨碑事蹟詳宋史本傳

參紀事本末  
宋大詔令

劉奉世傳

劉奉世字仲馮臨江新喻人做子元祐七年拜樞密直學士僉書院事紹聖元年以端明殿學士知成德軍改定州踰年知成都府過都入覲欲述朋黨傾邪

之狀帝將聽其來曾布曰元祐變先朝法無一當者  
奉世有力焉最爲漏網恐不足見遂不許明年賁光  
祿少卿分司南京居柳州再被邢恕劾貶隰州團練  
副使徽宗立盡還其官職知定州大名府鄆州崇寧  
初再奪職責居沂兗以赦得歸政和三年復端明殿  
學士薨事蹟詳宋史本傳

范純禮傳

范純禮字夔叟以父仲淹蔭爲秘書正字出知環州  
盧南有邊事調度苛棘純禮一以靜待之辨其可具  
者不取於民民圖像于廬而奉之如神名曰范公庵

元祐初爲吏部郎中進給事中徽宗立以龍圖閣學  
士知開封府鞠享澤村民謀逆純禮審其故此民入  
戲場觀優歸途見匠者作桶取而戴于首曰與劉先  
主如何遂爲匠擒明日入對曰愚民村野無知若以  
叛逆蔽罪恐辜好生之德以不應爲杖之足矣徽宗  
從之擢尙書右丞純禮沈毅剛正曾布憚之激駙馬  
都尉王誥曰上欲除君承旨范右丞不可誥怒會誥  
館伴違使純禮主宴誥誣其輒斥御名罷爲端明殿學  
士知潁昌府崇甯元年落職提舉崇福宮黨禁啟貶  
試少府監分司南京又貶靜江軍節度副使徐州安

置徙單州五年復左朝議大夫提舉鴻慶宮卒事迹

詳宋史本傳

參紀事本末

安燾傳

安燾字厚卿開封人登第用薦判吏部南曹時方興新法燾列其太甚于朝元豐初授諫議大夫六年同知樞密院事元祐二年進知院事以母憂去卒喪入爲門下侍郎常安民言教坊不當于相國寺作樂章愾譖其相表裏出知鄭州徙大名徽宗立復知樞密院以老避位知河南疏言東京黨禍已萌願戒履霜之漸語尤激切初建湟州議者以爲可棄燾在樞府

奏還之崇甯元年坐棄湟州議其罪降端明殿學士  
再貶甯國軍節度副使漢陽軍安置湟州復又降祁  
州團練副使鄯州復又移建昌軍閔再歲復通議大  
夫還洛卒後五歲悉還其官職事蹟詳宋史本傳

陸佃傳

陸佃字農師越州山陰人受經于王安石熙甯二年  
應舉入京安石當國首問新政佃曰法非不善但推  
行不能如初意還爲擾民如青苗是也安石驚曰胡  
爲乃尔吾與惠卿議之紹聖初坐實錄罪落職知秦  
州徽宗卽位累拜尙書左丞佃執政欲參用元祐人

才御史論呂希純胡安世復職太驟欲更懲元祐餘黨佃爲徽宗言不宜窮治乃下詔申諭揭之朝堂讒者用是詆佃曰佃名在黨籍不欲窮治正恐自及耳遂罷爲中大夫知亳州數月卒追復資政殿學士事蹟詳宋史本傳

黃履傳

黃履字安中邵武人第進士歷官吏部尙書哲宗立徙翰林學士履素與蔡確章惇邢恕相結確惇有怨惡使恕道風旨卽排擊之紹聖初爲御史中丞拜尙書右丞鄒浩以言事貶新州履乞徙善地坐罷知毫

州徽宗立召爲資政殿學士復拜右丞未踰年求去  
卒崇甯元年列名黨碑事蹟詳宋史本傳

參楊仲良  
紀事本末

張商英傳

張商英字天覺蜀州新津人哲宗初爲開封府推官  
連使河北江西淮南哲宗親政召爲右正言左司諫  
商英積憾元祐大臣不用已極力攻之既與陽翟民  
蓋氏養子漸交關事露責監江甯酒稅起知洪州累  
遷中書舍人謝表愿詆元祐諸賢衆益畏其口崇甯  
初爲吏部刑部侍郎翰林學士蔡京拜相商英雅與  
之善尋拜尙書左丞復與京議政不合屢詆京身爲

輔相志在逢君御史謂非所宜言且取商英所作元祐嘉禾頌及司馬光祭文斥其反復罷知亳州入元祐黨籍京罷相知鄂州京復相以散官安置歸陝二州大觀四年京再逐起商英知杭州過關留爲資政殿學士拜尚書右僕射京久盜國柄中外怨疾見商英能立同異更稱爲賢徽宗因人望相之時久旱彗星中天是夕彗不見明日雨徽宗喜大書商霖二字賜之因與方技郭天信語言往來事覺貶衡州安置太學諸生訟寃復還故官職宣和三年卒贈少保紹興中賜諡文忠事蹟詳宋史本傳

蔣之奇傳

蔣之奇字穎叔常州宜興人登進士第舉賢良方正  
試六論中選及對策失書問日報罷英宗覽而善之  
擢監察御史初之奇爲歐陽修所厚制科旣黜乃詣  
修盛言濮議之善以得御史後懼不爲衆所容因劾  
修帷簿事中書問狀無實貶監道州酒稅紹聖中累  
拜知樞密院事崇甯元年知杭州以棄河湟事奪職  
由正議大夫以疾告歸提舉靈仙觀列名黨碑三年  
卒後錄其嘗陳紹述之言盡復官職之奇爲部使者  
十二任六典會府以辦治稱且喜荐士在閩荐處士

陳烈在淮南荐孝子徐積特以畔歐陽修爲清議所  
辨事蹟詳宋史本傳

元祐黨人傳卷第二

誥授榮祿大夫三品頂戴前廣東南韶連兵備道調補高  
廉道權福建鹽運使司鹽法道加四級臣陸心源纂  
曾任待制以上官

蘇軾傳

蘇軾字子瞻眉州眉山人士嘉祐二年試禮部第一殿  
試中乙科後以書見歐陽修修語梅聖俞曰吾當避  
此人出一頭地治平二年判登聞鼓院熙寧二年王  
安石執政素惡其議論異己以判官告院四年安石  
欲廢科舉與臣校詔兩制三館議軾議上神宗即日召

對軾曰陛下天縱文武不患不明不患不勤不患不  
斷但患求治太急聽言太廣進人太銳願鎮以安靜  
待物之來然後應之帝悚然曰朕當熟思之安石不  
悅時安石創新法軾上書論其不便軾見安石贊帝  
以獨斷專任因試進士發策以晉武平吳以獨斷而  
克苻堅伐晉以獨斷而亡齊桓專任管仲而霸燕噲  
專任子之而敗事同功異爲問安石滋怒軾請外通  
判杭州徙知湖州李定舒亶摭其謝表語並媒孽所  
爲詩以爲謗訕逮赴臺獄欲置之死神宗憐之以黃  
州團練副使安置軾築室于東坡自號東坡居士哲

宗立召爲禮部郎中四年請外知杭州軾二十年間  
再蒞杭有德于民家有畫像飲食必祝又生作祠以  
報六年召爲吏部尙書改翰林承旨後以讒請外出  
知潁州未閱歲以兵部尙書召兼侍讀尋兼端明殿  
翰林侍讀兩學士爲禮部尙書哲宗親政出知定州  
紹聖初御史論軾掌內外制日所作詞命以爲譏斥  
先朝累貶寧遠軍節度副使惠州安置徽宗立移廉  
州改舒州團練副使徙永州赦還提舉玉局觀復朝  
奉郎建中靖國元年卒于常州高宗卽位贈資政殿  
學士崇贈太師諡文忠事蹟詳宋史本傳

劉安世傳

劉安世字器之魏人登進士第不就選從學於司馬光者盡心行己之要光教之以誠且令自不妄語始司馬光入相薦爲祕書省正字擢右正言進右諫議大夫出知成德軍章惇用事尤忌惡之初黜知南安軍再貶少府少監三貶新州別駕安置英州同文獄起徙梅州惇與蔡卞將必置之死因使者入海島誅陳衍諷使過安世脅使自裁又擢一土豪爲轉運判官使殺之判官疾馳將至梅嘔血而斃危得免徽宗卽位以集賢殿修撰知鄆州眞定府曾布又忌之不

使入朝蔡京既相連七謫至峽州羈管稍復承議郎  
卜居宋都宣和六年復待制中書舍人明年卒年七  
十八安世儀狀魁碩音吐如鐘在職累歲正色立朝  
其面折廷爭或帝盛怒則執簡却立伺怒稍解復前  
抗辭旁觀者遠觀蓄縮悚汗日之曰殿上虎一時無  
不敬憚年既老羣賢凋喪畧盡巋然獨存而名望益  
重梁師成用事能生死人心服其賢求得小吏吳默  
嘗趨走前後使持書來啖以卽大用默因勸爲子孫  
計安世笑曰吾若爲子孫計不至是矣吾欲元祐全  
人見司馬公于地下還其書不答事蹟詳宋史本傳

范祖禹傳

范祖禹字淳甫一字夢得其生也母夢一偉丈夫被金甲入寢室曰吾漢將軍鄧禹遂以爲名進士甲科從司馬光編修資治通鑑在洛十五年不事進取書成光薦爲祕書省正字時王安石當國尤愛重之祖禹竟不往謁哲宗立擢右正言遷著作郎右諫議大夫拜翰林學士改侍講學士紹述之論興有相章愔意祖禹力言愔不可用不見從遂請外以龍圖閣學士知陝州言者論祖禹修實錄詆誣又摭其諫禁中雇乳媪事追貶武安軍節度副使昭州別駕安置永州

賀州又徙賓化而卒建炎二年追復龍圖閣學士事蹟詳宋史本傳

朱光庭傳

朱光庭字公揆河南偃師人哲宗卽位司馬光薦爲右正言乞罷提舉常平官保甲青苗法遷右司諫拜給事中乞補外除集賢殿修撰知亳州加集賢院學士出禱雨拜不能興再宿而卒紹聖中追貶柳州別駕元符又停錮其諸子徽宗立復其官崇寧元年追

所復官入黨籍

宋史參楊仲良長編紀事本末

姚勳傳

姚勔字輝中越州山陰人嘉祐四年進士歷永康令重親猶在父母每以榮其親爲言勔乃請納祿以太子中允致仕遇郊封父母父母請回官封祖父母特從之宴居邱園稱道不倦清節懿行聞于鄉黨

樂城人

端良不苟甘貧二十年元祐二年以公卿交薦落致仕除宗正丞改秘書丞易太常博士改太常丞四年奏言本朝大饗明堂祀旻天上帝仍設五帝之坐及五帝五官之神元豐三年始設上帝一位不稱旻天其餘五帝以下神位悉罷請將來宗祀神宗皇帝于明堂以配上帝從祀之神如郊徧舉詔禮官審議六

年擢右正言奏御史中丞趙君錫雷同俯仰無所建  
明既薦秦觀才美後因屬官有言旋行陳首取舍翻  
復貽笑多士數日又言臣伏見潁昌府所勘趙仁恕  
公事已見情理欲結正之次只因仁恕父彥若奏論  
稱本路監司挾情擴拾意謂其子無贓污等事以爲  
枉陷非辜朝廷從此下別路差官推勘其勘官孟易  
因而觀望風旨將前勘大情出入以致錄問官疏駁  
自始降朝旨差官以至再勘凡經十餘月不能了絕  
但只淹延時日一行干證人久在囚繫皆緣彥若奏  
陳所致今來勘案內趙仁恕委有贓盜不法等事顯

是彥若專欲以私意苟免其子無忠正之心爲國家  
動搖吏議罔冒上聰使監司沮發適之劾勘官起觀  
望之意稽留獄禁冀追典刑臣備位言司不敢緘默  
謹按翰林學士趙彥若身爲從官親侍經幄可謂天  
子近臣矣其子敢爲不法干犯國典益彥若素乖義  
訓以負陛下厚恩自合引咎杜門惶怖待罪而乃公  
然論奏移過監司且犯罪麗刑邦有常憲假使勘院  
屈抑迨其結正自許翻論豈得規免獄成僥求別鞠  
若下民皆許如此則訟豈不煩如使貴者獨然則何  
以示天下今以彥若一言之訴遂至十餘月勘不圓

太平公朝而彥若侵亂邦法合行黜責臣竊嘗聞仁宗朝翰林學士張瓌與范鎮同判流內銓瓌有子因鎮廳補考當用審狀移縣令而鎮令用例以隨身厯子爲證是時瓌雖不與然知而弗正輔臣皆曰瓌應罰金勿劾仁宗曰不可瓌私其子不顧銓法特奪一官降知亳州且鎮失取審狀瓌誠不與尙且奪官責小郡蓋罪其懷情弗舉以倖其子也今彥若挾私罔上其罪當黜非瓌之比伏乞聖斷重行責降以厭輿論又言臣近曾上言乞責降趙彥若未蒙施行臣竊以法者天下之公共非一人法也法尊則朝廷尊朝

廷尊則羣下服故人臣不可以不敬法人臣而不敬  
法者必誅此百王不易典也今監司按吏是職也吏  
惡而監司不舉罪重而勘官不究則於朝廷之法何  
謂哉監司勘官者皆有朝廷之法在焉於彥若之子  
何有哉而彥若敢奪其成而請移之敢以聲勢動搖  
其獄而使出沒之如彥若者其不敬朝廷之法可謂  
甚矣彥若一移其獄紛紛至於半年不了天下獄事  
益當如此者乎推勘官出沒其情則無所加罪錄問  
官疏駁其失則無所是非由彥若故屈天下法彥若  
之罪豈小也哉今誣人以不實者反本罪告上以不

實者從徒坐而彥若誣監司挾情擲拾欺罔聖聰謂枉陷非辜彥若猶可以齒於人哉彥若者不敬朝廷之法不顧人臣之義但知愛子而不知愛君今不重懲臣恐佗日將有倣此者寢不可止陛下何以持至公之法而馭天下伏乞聖斷重行責降以戒後來彥若坐左轉尋改左正言奏趙君錫王鞏私欺公朝有壞綱紀又言李清臣除吏部尙書物議未允臣聞清臣曾任執政官昨在朝廷阿附時相隨邪用事無大臣之節清臣之命卒罷七年言先帝表章聖學用經術取士誠欲以大道於變斯文然議者以爲師用一

家之說習以成蔽不能貫通是以前日明詔復用詩賦此固陛下開廣育之路求賢取士之深意也然臣竊見學者自復詩賦以來於今五六年頗有未能工者以臣衡論人材其已學者復之難成不至如此就詢其由良亦有說蓋今貢舉之法習詩賦者仍試經義既學者期于必得則在兼通至有司責其俱優則兩難盡善何則業經者直求先王之道斷聖人之心至于詞賦雕鏤離析破碎主以聲病爲急二者不可得全猶責善視者必有聽也若用意散漫則兩俱不精倘能偏長則必有一短又經義一科行之稍久壯

齒以上所業已成一旦銷磨亦甚可惜而况通經辨道不猶愈于雕蟲又或聞將來經義舉人所取分數不多而詩賦兼經者又皆滅裂則是經義之名苟存而六藝之學凌廢也臣欲望朝廷並立詩賦經義各爲一科隨所試人多少均爲取士之格如此則永遠可行而學者專精一藝易見成就惟陛下裁擇天下幸甚又言劉摯朋黨不公又言禮部郎中葉祖洽貪鄙無狀不持廉節自淮南行替入京沿路商販祖洽坐斥知海州又言徐王府侍講魏廣浪游市廛熟諂邪徑既無行誼亦無經術廣尋改軍器少監除起居舍

人遷起居郎尋兼權給事中詔呂惠卿光祿卿分司  
勳封還詞頭罷之八年言知興州孫賁知眞州日以  
筵會爲事暱近娼女聞親弟之喪匿而不舉賁改知  
淮陽軍明年擢國子祭酒紹聖初言者論其阿附呂  
大防范純仁謫知信州寔序辰等論不已落職以奉  
議郎管勾洞霄宮紹聖四年再貶守水部員外郎分  
司南京衛州居住尋卒崇寧三年入黨籍後贈寶文  
閣待制勳以孝行著每省先墓素衣步出城門且行  
且嘔涕至墓見者爲之感動

通鑑長編參會稽志宋  
大詔令紀事本末卷百

趙君錫傳

趙君錫字無愧河南洛陽人安仁孫良規子事父不  
違左右元祐初遷右司郎中擢給事中論蔡京章惇  
有罪不宜復職拜御史中丞紹聖中貶少府少監分  
司南京卒紹興六年贈徽猷閣直學士事蹟詳宋史  
本傳

馬默傳

馬默字處厚單州武城人神宗卽位以論歐陽修事  
通判懷州司馬光爲相除河北都轉運使久之告老  
提舉鴻慶宮紹聖四年坐附司馬光落寶文閣待制

致仕單州居住卒元符三年復官崇寧元年入黨籍  
紹興中以其子純請贈開府儀同三司加贈太保事  
蹟詳宋史本傳

參紀事  
本末

孔武仲傳

孔武仲字常父元祐中□歷秘書省正字著作郎拜  
中書舍人遷禮部侍郎以寶文閣待制知洪州坐元  
祐黨奪職管勾玉隆觀池州居住元符元年卒元符  
末追復之事蹟詳宋史本傳

參通鑑長  
編五百二

孔文仲傳

孔文仲字經父臨江新喻人舉進士南省第一熙寧

初翰林學士范鎮薦制舉對策萬言力論理財用兵之法非是王安石怒啟神宗御批罷歸故官元祐初以祕書省校書郎進禮部員外郎擢右諫議大夫疏論青苗免役首困天下保甲保馬茶鹽之法遺螿留蠹改中書舍人三年同知貢舉先有寒疾及是晝夜不廢職疾甚還家而卒年五十一蘇軾捐其柩曰世方嘉輒熟惡呼噪求勁直如吾經父者今無有矣後追貶梅州別駕元符末復其官崇寧元年追所贈官入黨籍事蹟詳宋史本傳

參紀事本末

吳安持傳

吳安持建州浦城人父充宋史有傳以蔭爲同勾當  
開封府司錄司檢校庫熙寧四年言本庫檢校孤幼  
月給錢歲給衣逮及長成或至罄竭乞以見錢貸人  
令人抵當出息厯太子中允同提舉市易司時妻父  
王安石爲相安持倚勢抑配以邀恩賞充屢戒之不聽  
及充爲相安持以父在中書乞罷領市易始改羣牧  
判官除太常博士元豐八年知滑州改知蘇州元祐  
元年召爲將作少監先是元豐間河決南宮口敕自  
後不得復議回河元祐初文彥博呂大防薦安持爲  
都水使者安持與都監勾當公事李偉力主東流議

調夫十萬人奏作北流軟堰門下侍郎蘇轍極言軟  
堰不可施於北流已而北流壅遏河水潰決四出安  
持請開分水河以減漲水復於西隄作鋸牙馬頭約  
水東流然東流地勢既高迄無成績累官太僕少卿  
知成德軍紹聖三年爲眞定路經畧使元符元年遷  
寶文閣待制知穎昌府二年除河北路都轉運使仍  
專切措置河事會河決內黃口議者追咎安持導河  
東流安持不自安遂辭新命左司諫王祖道請正安  
持等罪落寶文閣待制降授朝散大夫少府監分司  
南京陳州居住時水官分等第治罪尙書左丞蔡卞

安持妻姊之夫也故得陳州三年以徽宗登極恩復  
官尋遷工部侍郎崇寧元年削職入黨籍

通鑑長編  
參揚仲良

紀事  
本末

錢總傳

錢總字穆父吳越王之後彥遠之子也生五歲日誦  
千言十五歲制舉之業成熙寧三年應試既中秘閣  
選會王安石惡孔文仲策遷怒罷其科遂不得第以  
蔭知尉氏縣元祐初遷給事中知開封府老吏畏其  
敏欲困以事導人訴謀至七百總隨卽判決上下皆  
驚咤蘇軾乘其据案時遺以詩總操筆立報軾曰電

掃庭訟響答詩筒近所未有也哲宗親政翰林缺學士帝以命魏仍兼侍讀章惇極排之諷全臺攻不已罷知池州卒元符末追復龍圖閣學士崇寧元年入黨籍事蹟詳宋史本傳

參楊仲良紀事本末

### 李之純傳

李之純字端伯滄州無棣人第進士元祐初知滄州召爲戶部侍郎三遷御史中丞董敦逸黃慶基等論蘇軾託詞命以毀先帝蘇轍以名器私所親之純疏其誣罔乃黜敦逸慶基以疾改工部尙書紹聖中劉拯劾其阿附蘇轍出知單州卒四年追職及遺表恩

澤崇寧元年入黨籍事蹟詳宋史本傳

參長編紀事本末

### 孫覺傳

孫覺字莘老高郵人甫冠從胡瑗學登進士第調合  
肥主簿歲旱督州民捕蝗覺曰民方艱食若以米易  
之是除害而享利也守悅推其說於諸路熙寧二年  
知諫院王安石早與覺善驟引用之將以爲助青苗  
法行條奏其妄出知廣德徙湖州哲宗卽位擢御史  
中丞以疾請罷除龍圖閣學士提舉舒州雲仙觀卒  
年六十三覺爲王安石所逐不以介意安石退居鐘  
山覺枉駕道舊迨其死又爲文以誄其德量如此紹

聖中以覺爲元祐黨奪職追官徽宗卽位復官職崇  
寧元年入黨籍事蹟詳宋史本傳

參楊仲良長編紀事本末

### 鮮于侁傳

鮮于侁字子駿閬州人第進士神宗詔求直言侁爲  
蔡河撥發應詔陳十六事以范鎮舉除利州運判初  
王安石有重名士大夫期以爲相侁曰是人若用必  
壞亂天下至是乃上書曰可爲憂患者一可爲太息  
者二其他逆治體而召民怨者不可概舉意專指安  
石安石怒毀短之元豐二年知揚州蘇軾自湖州赴  
獄親朋皆絕道揚侁往見臺吏不許逼或謂侁宜亟

焚軾所往來詩文以避禍仇日欺君負友我不忍爲  
以忠義分譴則所願也哲宗立召爲太常少卿在職  
三月以疾求去除集賢殿修撰知陳州滿歲進待制  
無何卒崇寧元年入黨籍事蹟詳宋史本傳參楊仲良長編

紀事本末

趙彥若傳

趙彥若字元考青州人父師民宋史有傳彥若內行  
修飾節操堅正傳家集博學強記沈酣書林道鄉集以父

任爲將作監主簿嘉祐四年大理評事爲館閣編校  
書籍官熙寧初太常丞祕閣校理通判淄州獄有失

火偽印者法當死彥若謂在律雜犯死罪親年九十無兼養應上請與知州解賓王謙異遂獨劾奏二人得貸死賓王許彥若不過聽謫監單州酒稅四年召歸五年同知禮院時議復僖祖彥若謂歷代非初卽位復已祧之主者獨有開元故事因言太廟止有八室乞候有司議定祧後依唐制增爲九室之廟奉僖祖神主還居舊室不報彥若乞免同知禮院從之九年累官太常博士元豐二年爲祠部員外郎秘閣校理兼修百官公卿表改集賢校理兼知宗正丞奏言據仙源積慶圖克頌秦王廷美曾孫紀國公德存孫

河東郡王承衍子在今爲三從外無服之親名銜不當稱皇叔廷美十子各有封國子孫繫屬自存本統克頌合稱紀國公孫謹按禮記曰君有合族之道族人不得以其戚戚君位也鄭氏注族人皆臣也不得以父兄子弟之親自戚於位謂齒列也所以尊君別嫌唐有司奏宗子皇字爲稱首從數爲序親誠非不戚君位之義儀禮從父昆弟則今同堂也從祖昆弟則今再從也族昆弟則今三從也三從內請依舊餘各以祖稱本封爲某王公子孫此則唐之皇親三從內於皇字下有從及再從及三從外則不書皇各以

其祖先所封爲房冠於頭銜周小宗伯掌三族之別以辨親疏漢宗正敘九族其制一也今宗室文書行於曹局銜位之上雖三從外亦無從數非所謂敘也親疏一概不異其文非所謂辨也臣以爲骨肉之恩固在敦睦然上下名分不得不正且有司之事豈可使天旨自親其文是乃臣之責任所當守職而論也伏願據宗藩慶緒錄悉正其名應同堂親於皇字下加從字再從三從親又加再三字三從之外各以其祖先所封郡國爲房分而系其世次不書皇字則親疎有別尊卑不黷又言禮院更定薦新於兩廟既徹

方驗蒲盡老硬無復有白蓋議禮者但取芟之同類以相代而不思蒲之過時不可食也臣竊考之於詩韓侯秋見菽用筍蒲皆是其蒲非謂新物周禮醢人掌加豆之實深蒲醢醢筍蒲魚醢祭祀供薦羞之豆實賓客亦如之此則肉之醢菜之菹賓祭內羞四時不闕維筍及蒲固所以待賓客其義明矣鄭氏注深蒲云蒲始生水中者草木蟲魚疏云蒲周禮以爲菹始生取其中心入地莖及云菹蔣亦可用並言蒲始生自不在秋故本草曰蒲四月采唐本注云蒲初春生用白爲菹是也唐禮薦新多不限月筍蒲芡藕各

維其時今近地茭白特饒舊制參於秋薦卽菰蔣也  
廣雅曰菰蔣其末雕胡說文作雕菰周禮食醫膳食  
之宜魚宜菰茭是其萌徐鉉歲時廣記所謂菰草爲  
茭者也雖亦春生至秋可食與蒲有異臣據詩言食  
藹及萹烹葵及菽以同時言及則維筍及蒲亦自可  
知况當薦筍之辰正是食蒲之始伏請改從春獻用  
協天時從之又奏言昔漢之取人不限疎近而宗正  
有郡國歲計上籍之文劉向以宗室高才進對待詔  
唐宗正寺歲送進士二十人李程李肱皆爲舉首今  
宗正寺侍祠之外專掌玉牒屬籍而不豫薦士竊恐

臣之本職有所未稱謂宜具爲條統俾諸教官依國子監外官學例爲課試法每遇秋賦許就宗正寺投狀鎖試別立人數頗示優異著爲格令賢戚並用紀綱四方何獨樸樸之雅乎凡天下事皆如權衡重於此則輕於彼矣宗室之間自有考校賢者獲升不肖者退抑分當裁損必無缺望夫親賢兼進布列中外以鎮安四海爲磐石之固與愚智混淆聚於一處徒殫祿廩而無所事者不可同日語也尋爲國史院編修官四年奏進百官公卿表十卷宗室世系表三卷賜銀絹有差改朝散郎集賢校理同修起居注五年

試中書舍人兩朝正史成賜彥若子選一官呂公著  
知定州彥若草制王安禮父名益嫌告用益字塗改  
數句彥若不從及權起居郎因對邇英閣奏之六年  
爲右諫議大夫言王事之本陰陽爲先月令孟春之  
月命相布德和令行慶施惠下及兆民所以致驩聲  
而達陽氣是以王者游豫燕飲與眾人同樂爲天下  
自娛感召和氣之端贊化育而參天地也伏緣正月  
陛下嘗謁景雲宮臣比陪從至繼仁殿竊見聖情思  
慕猶如前時公卿侍臣無不惻楚伏維孝治之至大  
舜何以加臣敢過計豫言者以慶壽變除歲月漸遠

而少陽用事生氣尙微若孝思發中或復感動慮於  
時令有所未順雖上聖至德非可以常經格之然屈  
己從人亦明主之所不違欲望將來繼仁殿所陳服  
玩酌獻之初慙從隱蔽抑忍聖意奉承天時無虧孝  
慕之誠以順陽和之令又言三公論道經邦變理陰  
陽又曰冢宰掌邦治統百官均四海皆舉大體故陳  
平官宰相上佐天子理陰陽下遂萬物之宜外鎮撫  
四夷內親附百姓使卿大夫各得任其職蓋據此以  
爲說也周禮太宰分職則詳是知三公之官不無吏  
事之責風聞去年官制初行有司議同職犯罪四等

自是律文之正固當以時舉行而執政大臣不以爲便乃引陳平之言自解而廢沮法律正文必若所云宜知大體然前時執法奏大臣不置都簿大臣亦奏御史臺不置都簿以報之近日執法奏大臣依刑部申不用符召寺吏大臣亦奏執法前在禮部不用符召寺吏以報之執法者旣罪白而罰當矣臣獨疑大臣不能以道德承聖化而專任小數校量必勝失大臣體自謂得計而內不憂於職事外不畏於人言以此爲調變之功則似非天意以此爲輔佐之效則實負聖明伏計寬仁未忍切責願垂戒敕俾知省思庶

有恐懼之心可以助致和氣不報又言伏見尚書省聽事寫周官篇此朝廷稽古命官之本也周官大旨在乎得人故曰不惟其官惟其人又曰官不必備惟其人今門下侍郎章愔尚書左丞王安禮並無行檢非周官之所謂惟其人也自居執政未聞有補而異黨復一人畏其彊僚屬觀望雖謫不悔權勢至此不宜處位請皆外補以肅具臣詔以彥若侵越降官試祕書監尋罷爲龍圖閣待制知亳州八年以司馬光薦召兼侍讀提舉萬壽觀元祐元年擢兵部侍郎二年充實錄院修撰三年與傅堯俞范百祿陸佃曾肇

劉攽彭汝礪劉奉世盛僑翟思趙挺之王彭年上言  
殿試宜復祖宗三題之法五年改禮部侍郎尋權刑  
部尚書兼侍讀改禮部尚書六年改朝請大夫翰林  
學士知制誥子仁恕爲陽翟令酷虐貪贓爲提刑鍾  
浚所發彥若上書言臣往爲諫官嘗劾王安石浚實  
安禮黨恐挾此報怨願移獄改推御批依奏右正言  
姚勔御史賈易虞策安鼎論彥若庇子之惡誣人罔  
上彥若三上章請祠不允六年罷兼侍讀尋除寶文  
閣學士提舉萬壽觀言者猶未已除樞密直學士提  
舉萬壽觀任便居住有旨差兵級二十人送還青州

並僱給所當船彥若不肯復留不以一毫千人稅客  
舟飄然而去以范祖禹言詔與祖禹同修神宗實錄爲  
國史院修撰兼知院事七年十月除翰林侍讀學士  
與蘇軾呂希哲范祖禹豐稷顧臨吳安詩上言乞校  
正陸宣公奏議尋以翰林學士提舉兗州景龍宮紹  
聖元年以修神宗實錄美意良法輒敢隱沒得之傳  
聞微言譏刺者數十事責授安遠軍節度副使澧州  
安置尋卒崇寧元年入黨籍大觀二年出黨籍李燾通鑑  
長編參紀事本末長安志序宋史全  
文九朝編年諸臣奏議書錄解題 彥若爲司馬光  
上客未嘗有私謁步里無書不記世謂着脚書樓然

客談

性不矜伐而尤恭謹館中諸公論藥方有藥不知所  
出或云問彥若必能記時彥若在下座對曰在幾卷  
幾葉第幾行附某藥下檢之果驗眾怪曰諸公紛紛  
而子獨不言何也彥若曰諸公不見問所以不敢言  
耳元豐間三韓使在四明倡和詩奏到其詩序有慚  
非白雪之詞輒效青唇之唱之句神宗問青唇事近  
臣皆不知因薦彥若對在某小說中然君臣間難言  
也容臣寫進本人上覽之止是夫婦酬答語因問大  
臣彥若何以不肯面對或曰彥若素純謹在君父前  
宜其恭謹如此上嘉歎

曲洧  
舊聞

趙高傳

趙高字公才邛州依政人熙寧初擢陝西宣撫判官  
交趾叛爲安南行營經畧招討使元祐五年拜端明  
殿學士遷大中大夫卒贈右光祿大夫紹聖四年以  
高與元祐棄地議追職並兩官及遺表恩澤元符末  
復大中大夫崇寧元年追奪入黨籍事蹟詳宋史本

傳參揚仲良長  
編紀事本末

王欽臣傳

王欽臣字仲至父洙宋史有傳欽臣清亮有志操以  
文贄歐陽修器重之用蔭入仕文彥博薦試學士院

賜進士及第元祐初爲工部員外郎改集賢殿修撰知和州徙饒州紹聖四年詔欽臣因緣奸黨躡躑要班挾持詭謀鼓扇凶焰落職管勾江州太平觀徽宗立復待制知成德軍卒年六十七欽臣平生爲文至多所交盡名士性嗜古藏書數萬卷手自讐正世稱善本事蹟詳宋史本傳

參揚仲良長編紀事本末

### 孫升傳

孫升字君孚高郵人第進士簽書泰州判官元祐初爲監察御史擢中書舍人以天章閣待制知應天府董敦逸黃廷基摭升過改集賢院學士紹聖初翟思

張商英又劾之削職知房州歸州貶水部員外郎紹聖四年坐顯附元祐肆爲譏訕責授果州團練副使汀州安置卒元符末追復集賢殿學士崇寧元年追所復職入黨籍事蹟詳宋史本傳

參楊仲良長編紀事本末

### 李周傳

李周字純之馮翊人登進士第歷通判施州州介羣獠不習服牛之利爲辟田數千畝選謫戍知田者市牛使耕軍食賴足神宗詔近臣舉士孫固以周聞召對除京西提刑哲宗立召爲職方郎中改集賢殿修撰卒年八十紹聖中追貶賀州別駕後復舊職事蹟

詳宋史本傳

王汾傳

王汾字彥祖

陳古靈集卷五

鉅野人曾祖禹偁宋史有傳父

同忠武軍節度判官熙寧六年右正言判國子監常  
秩言回學術行義宜加旌勸詔錄汾爲郊社齋郎後  
第進士甲科治平三年召試館職元豐二年知河中  
府坐收受蘇軾譏訕朝政文字罰銅二十斤元祐元  
年爲朝請大夫諸王府翊善進左中散大夫直秘閣  
三年爲祕書少監擢太常少卿王安石薨汾上書陳  
述義理請賜惡諡以爲後來之戒縉紳之論莫不多

汾中丞李常惡汾傷王氏疾之若仇及汾除右諫議大夫常率全臺言汾口吃滑稽不任諫職汾亦自辭四年爲直龍圖閣知明州劉安世言汾並無過惡止以口吃滑稽一二小事乃令報罷中外之論不以爲直尋召爲祕書少監擢兵部侍郎遷祕書監五年爲兵部侍郎六年請外爲寶文閣待制知齊州尋以中大夫充寶文閣待制致仕紹聖三年以元祐之際附會詆欺落職依前官致仕崇寧元年入黨籍

通鑑長編參盡

言集宋大詔令楊仲良紀事本末

韓川傳

韓川字元伯陝人元祐中用劉摯薦爲監察御史進中書以龍圖閣待制守潁州與孫升同責由坊州郢州貶屯田員外郎分司岷州團練副使道州安置徽宗立復故官崇寧元年落集賢殿修撰管勾崇福宮入黨籍不得與在京差遣五年星變除黨籍知青襄二州卒事蹟詳宋史本傳

顧臨傳

顧臨字子敦會稽人神宗以臨喜論兵詔編武經要畧且召問兵對曰兵以仁義爲本動靜之機安危所繫不可輕也因條十事以獻元祐二年擢給事中紹

聖初以龍圖閣學士知定州徙應天河南府中人梁  
惟簡坐嘗事宣仁后得罪過洛轉運使郭茂恂徇時  
宰意劾臨與之宴集奪職知歙州紹聖四年又以附  
會黨人落職管勾洪州玉隆觀饒州居住卒年七十  
二徽宗立追復之事蹟詳宋史本傳

參楊仲良長  
編紀事本末

賈易傳

賈易字明叔無爲人七歲而孤母彭以紡績自給日  
與易十錢使從學易不忍使一錢每浹旬輒復歸之  
年踰冠中進士甲科元祐初爲太常丞遷左司諫與  
呂陶交攻遂劾陶黨附蘇軾兄弟並及文彥博范純

仁宣仁后怒出知懷州明年召拜御史上書言天下  
大勢可畏者五蘇軾守杭州訴浙西災潦易率其僚  
論軾姑息邀譽議者由是薄易出知宣州元符中累  
謫保靜軍行軍司馬邵州安置徽宗召爲太常少卿  
進右諫議大夫改權刑部侍郎歷工部吏部以寶文  
閣待制知鄧州入黨籍事蹟詳宋史本傳

呂希純傳

呂希純字子進公著第三子歷宗正太常祕書丞權  
太常少卿章惇旣相出爲寶文閣待制知亳州諫官  
張商英憾希純攻之力徙睦州歸州自京東而之浙

西自浙西而上三峽名爲易地實困之也公著追貶  
希純亦以屯田員外郎分司南京居金州又責舒州  
團練副使道州安置建中靖國元年還爲待制知瀛  
州改潁州入崇寧黨籍卒事蹟詳宋史本傳

曾肇傳

曾肇字子開建昌南豐人元祐初拜中書舍人七年  
爲吏部侍郎出知瀛州治實錄譏訕罪降滁州復集  
賢殿修撰歷泰州海州徽宗卽位復召爲中書舍人  
元祐臣僚被遺者咸以赦恩甄敘肇請併錄死者訓  
詞哀厚惻怛讀者爲之感愴遷翰林學士兼侍讀建

中靖國元年兄布在相位避禁職拜龍圖閣學士提舉中太一宮未幾出知陳州歷太原應天府揚定二州崇寧初落職謫知和州徙岳州繼貶濮州團練副使安置汀州四年歸潤而卒紹興初諡日文昭事蹟詳宋史本傳

王覲傳

王覲字明叟泰州如皋人第進士熙寧中爲編修三司令式刪定官哲宗立呂公著范純仁薦其可大任權右正言進司諫上疏言國家安危治亂系于大臣今執政八人而姦邪居半使一二元老何以行其志

哉因極論蔡確章惇韓縝張璪朋邪害正章數十上  
相繼斥去覲在言路欲深破朋黨之說朱光庭訐蘇  
軾試館職策問呂陶辨其不然遂起洛蜀二黨覲言  
軾之辭不過失輕重之體耳若悉攻同異深究嫌疑  
則兩歧遂分黨論滋熾夫學士命詞失指其事尙小  
使士大夫有朋黨之名大患也帝深然之改右諫議  
大夫出知潤州入拜刑戶二部侍郎紹聖初貶少府  
少監分司南京又貶鼎州團練副使徽宗卽位還故  
職遷御史中丞時任事者多乖異不同覲言堯舜禹  
相授受堯不去四凶而舜去之堯不舉元凱而舜舉

之事未必盡同文王作邑于豐而武王治鎬文王關  
市不征澤梁無禁周公征而禁之不害爲善繼善述  
神宗作法于前子孫守於後至于時異事殊須損益  
者損益之于理固未爲失也當國忿其言改爲翰林  
學士知潤州罷主太平觀安置臨江軍覲持正論始  
終再罹遺逐不少變無疾卒年六十八紹興初追復  
龍圖閣學士事蹟詳宋史本傳

范純粹傳

范純粹字德儒以仲淹蔭積遷至贊善大夫出知滕  
州元豐中爲陝西轉運判官哲宗立以直龍圖閣代

吳居厚爲京東轉運使盡革其苛政代兄純仁知慶州時與夏分疆界純粹請棄所取地元祐中召爲戶部侍郎又出知延州紹聖初御史郭知章論元祐棄地事降直龍圖閣明年復以寶文閣待制知熙州厯渭州旋以元祐黨人奪職知均州徽宗立起知信州復故職知太原再臨延州改知永興軍尋以言者落職知金州提舉鴻慶宮又責常州別駕鄂州安置錮子弟不得擅入都會赦復領祠久之以右文殿修撰提舉太清宮黨禁解復徽猷閣待制致仕卒事蹟詳

宋史本傳

呂陶傳

呂陶字元鈞成都人蔣堂守蜀延多士入學親程其  
文嘗得陶論集諸生誦之曰此賈誼之文也陶時年  
十三一座皆驚由是禮諸賓筵元祐初擢殿中侍御  
史首獻邪正之辨遷中書舍人俄以集賢院學士知  
陳州徙河陽潞州奪職再貶庫部員外郎分司徽宗  
立復集賢殿修撰知梓州致仕卒崇寧元年入黨籍  
事蹟詳宋史本傳